

28. juli 2021

UKA2021/51

Inatsisartut Suleriaasianni § 33, imm. 1 naapertorlugu aalajangiiffigisassatut siunnersuut imaaattoq matumuuna saqqummiuppara:

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikorsiissutit pillugit allannguiteqaqqullugit¹, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikorsiissutinik ikiorneqarsinnaanngortillugit, kræfteqarlutik nappaateqarnertik ilutigalugu katsorsagassanngoraangamik naliginnarmik akissarsiornertik unikkallaraangat sulisinnaajunnarnertik pissutigalugu. Nalunaarusiami erseqqissarneqassaaq ajornartorsiuut qanoq isikkoqarnersoq aammalu qanoq ikiortarialiunersut taamatut pisinnaatitaaffilissapata. Nalunaarusiaq juli 2022-mi kingusinnerpaamik saqqummiunneqassaaq.

(Inatsisartunut ilaasortaq, Erik Jensen, Siumut)

Tunngavilersuineq:

Ukiut tamaasa inuit 200 kræfteqarlutik paasineqartarpuit, kræftillu katsorsarnerata nalaani qulakkeerneqarsinnaanngilaq kræfteqalinnginnermi isertitarineqarsimasut ataatiinnarneqarsinnaasut. Nunarput qujanartumik peqqinnissaqarfikkut ima ajunngitsigisumik aaqqissugaavoq allaat angalanissaq, najugaqarnissaq aningaasartuutilu allat kræftip katsorsartinnerata akiliunneqartarlutik. Nammineq pigisaralugu illuuteqarsimaganni imaluunniit inissianik piginneqateqarluni illuuteqaraanni ajuusaarnartumik navianartorsiertoqariaannaavoq, kræftip katsorsarnerata nalaanni aningaasarsiorsinnaajunnartarmata, taamaalilunilu illoq nammineq pigisaq annaariaannaalluni.

Ukumi 2019-imi misissuisoqarmat paasinarsisimavoq, pisortat ikorsiissutaannik pisartagallit piginneqatigiillutik inissiaatillit imaluunniit namminerisamik illuutillit annerusumik aningaaserivikkut aningasanik atorniaratariaqalersartut, inissiaatiminni aningaasartuutiminnut naammattusaarnisartik sapilerlugu, pisortatigummi ikorsiissutit tunniunneqarsinnaasut aalajangersimasumik aningaasartuutaasunut naammanngimmata².

¹ Pisortanit ikorsiissutit pillugit Inatsisartut peqqussutaat nr. 15, 20. november 2006-imeersoq

² 2019, VIVE: Analyse af offentlig hjælp, side 15



Inatsivut imatut sananeqaateqarput allaat, innuttaasut ilai aningaasanik atorniartariaqarlutik aningaasatigut atukkanut allanut akissaqarumalluni, inissaqarnissani imaluunniit ilaqtariittut inissaqarnissartik qulakkeerumallugu.

Ilumut taamaaliunnarluta akuerineqarsinnaava? Naamik, tamanna akuerineqarsinnaangilaq.

Allanguutinik pilersitsivallaalersinnata, soorunami pissutsit piviusut inisseeqqaartariaqarpavut. Kræfteqarlutik napparsimasut privatimik illuutillit/piginneqatigiillutik illuutillit qassiuppat? Inuit qassiusimassappat naliginnarmik akissarsiorsinnaajunnaarlutik inisseqqalersut kræftimik katsorsagaanertik pissutigalugu? Pisortat aningaasartuutaat qanoq amerlatseriassappat, pisortanit ikorsiissutit pillugit Peqqussutaasoq allanngortillugu akuerineqassappat?

Naliginnarmik isertitat uani imatut paasineqassapput naliginnarmik akissarsiatiqut isertitat imaluunniit namminersortut isertitaat, tassunga sanilliulligit. Akisussaaqataavugut qulakkeerniassagutsigu inuit ilungersorlutik sulisimasut, akileraarutiminnik akiliuarsimasut imaluunniit nammineq aningaasaatitik atorlugit namminerisamik illuutitaarsimasut, illuutiminnut atorniarsimasatik akilersorsinnaajunnaarunikkit, naliginnarmik isertitatik annaagunikkit.

Taamatut oqaaseqarlunga neriuupunga Inatsisartut siunnersuutiga ilassilluassagaat. Qujanaq.

Siunnersuutip aningaasatigut allaffissornikkullu pisortanut kingunerisassai

Aningaasatigut kingunerisassai naatsorsuutigineqarput ukioq ataaseq nalunaarusiornikkut suliassaq A/C-erimik ataatsimik nalinganik annerunavianngitsoq, tamanna 500.000 kr.-inik naleqassassoq.

Siunnersuutip aningaasatigut allaffissornikkullu namminersortunut kingunerisassai

Soqanngilaq

Siunnersuutip aningaasatigut allaffissornikkullu innuttaasunut kingunerisassai

Soqanngilaq